

Dithero tsa Tirelano mo Kutlwanong

44/2014 Ka Sontaga wa 10 morago ga moletlo wa Borarobongwe, e le ka 24. 08. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 27 - 25/24
2. **Thapelo:** Modimo wa rona, o re utlwele botlhoko ka bopelotlhomogi jwa gago. Phimola ditlolo tsa rona ka ntlha ya bopelonolo jo bogolo jwa gago. O re tlhapse mo bosuleng jwa rona, o re itshekise boleo jwa rona. Re kopa jalo mo leineng la ga Jesu Keresete, Mopholosi wa rona. Amen.
3. Epistolo ka fa thulaganyong ya 2 e kwadilwe mo go Baroma 11:25-32;
Efangele ka fa thulaganyong ya 1 e kwadilwe mo go Luka 19:41-48.
4. A go ipolelwe tumelo ya bokeresete!
5. Sefela sa - - 253/-
6. Thapelo ya mmadi wa thero.
7. **Lefoko la thero** ka fa thulaganyong ya 6 le kwadilwe mo go 2 Dikgosi 25:8-12, le re: "Kangwaga wa 19 wa puso ya ga Nebukatenesare kgosi ya Babelle ka kgwedi ya botlhano e supa ga tla Nebusaradani, tlhogo ya bafemedi ba kgosi, motlhanka wa kgosi ya Babelle kwa Jerušalema. A fisa Ntlo ya MORENA le ntlo ya kgosi le matlo otlhe a Jerušalema; a fisa matlo a magolo otlhe ka molelo. Batlhabani botlhe ba Bakalatea ba ba neng ba na le tlhogo ya bafemedi ba kgosi ba diga dipota tsa Jerušalema tikologong. Mme masalela a batho ba ba setseng mo motseng le bathobi ba ba ineetseng kgosi ya Babelle le masalela a bontsi Nebusaradani, tlhogo ya bafemedi ba kgosi, ya ba isa mo botshwarong. Fela bangwe ba bahumanegi ba kwa nageng tlhogo ya bafemedi ba kgosi ya ba sadisa go nna balemi ba masimo a moweine le ba masimo a mangwe." Amen.
8. **Thero:** Ditsala tse di rategang tsa Morena wa rona Jesu Keresete, a e ne e se tshenyego e e boitshegang?! Motse wa Jerušalema o digilwe. Mofemedi wa moheitane wa kgosi ya kwa Babelle o fentse Baiseraele, a fisa motse o o boitshepo wa Modimo, a rutla zonke izisekelo zendlu ya bonno jwa ona mo lefatsheng. Le matlo a motse o o neng wa phatsima sentle mo go kalo a fisitswe, ntlo ya kgosi ya rutliwa, mmogo le maje a mabotana a tempele e e boitshepo a ne a phatlalediwa fela, le mabotana otlhe a matlo a motse oo. Baagi ba ona ba nyadiwa, ba kokobediwa, ba tlhajwa ke ditlhong, batlotlegi botlhe ba faladiwa, ba patikwa mo go maswe, ba hudutshwa mo mafatsheng

a baditšhaba. Ga sala fela bahumanegi ba bahumanegi, ba tlogelwa go tlhokomela masimu a weine, le go lema masimu a mangwe.

Bogalaka jwa botlhoko lobuya jwa ata mo go maswe ka go gopola gore mosimegi yo mogolo wa kgosi ya kwa Babel, e bong Nebusaradani a senya motse o montle wa Siyone, le ka go gopola gore ba Babel ba ne ba le bogale mo go maswe, ba patika, le go kokobetsa kgosi ya Bajuta, e bong Sedekia, le go bolaya bomorwae fa pele ga matlho a gagwe, le go mphoufatsa, le go mmofa ka diketane jaaka lekgoba, le go mo hudutsha ka go isiwa kwa Babel e le mogolegwi. E ne e le tshenyegelo e e maswe fela! Bosula jo bogolo jwa tshenyegelo eo e ne e le go itse gore e ne e le petso ka ntlha ya melato ya bone ya go ineela mo medimakong ya baditšhaba, ka ntlha ya go sa ikanye Modimo wa nnete, go tshela ga bone ka go ineela mo maleong. Mo bokhutlong Modimo o ne wa re: Go ntse jaanong go a lekana, o sa tlhole o ba itshokela! Wa otlhaya batlhaodwi ba ona, e bong batho ba ona. Morwalela, le tshenyegelo ya Sotoma le Gomora e a gopotsa gore Modimo o otlhaya ka petso e e boitshegang, jaaka go kwadilwe mo go Bahebere 10:31 gore "ke se se boitshegang go wela mo diatleng tsa Modimo o o tshelang." Ditshenyegelo tse di ntseng jalo ga di a kgaoganyediwa fela baba ba Modimo, mme ga otlhayiwa le ba Modimo, ke re le ba ntlo ya ona, jaaka moporofeti Amose a gopola, a re: "Ke lona lo le losi ke lo itsileng mo ditshikeng tsotlhe tsa lefatshe; ka ntlha ya moo ke tla lo beletsa maleo otlhe a lona," Am. 3:2. Ke tlhagiso e e utlwalang sentle, ke tshipi e e lelang gore re se ka ra tshameka ka dipetso tsa Modimo, le e seng go gopola gore dipetso tsa ona di ka tshegiwa fela. Gape a re se ka ra nyatsa dithulaganyo tsa ona, gonne o tlhokomela ka tlhoafalo e kgolo gore ditaolo tsa ona di tshegediwe, re se leke go di tla, le fa e le thulaganyo epe ya tsa ditestamente tsa ona. Ke se re se ithutileng mo Kategisimeng e nnye ya ga Luther ka mafoko a a reng: "Modimo o bolela petso pele mo go botlhe ba ba tloang ditaolo tsa ona. Ke ka moo re tshwanetseng go boifa bogale jwa ona gore re se ka ra dira sepe se se kgatlhanong le ditaolo tse." Gape Morena wa rona Jesu Keresete o re tlhagisetsa ka go re gopotsa, a re: "Mongwe le mongwe yo o neetsweng tse dintsi, go tla batlwa tse dintsi mo go ene; yo o filweng taolo mo go tse dintsi, go tla batlwa tse di fetisang mo go ene," Luk. 12:48.

Kgosi eo, Mopholosi Jesu Keresete o lekotse morafe wa Iseraele, a tsena mo motseng wa Jerušalema, o o neng wa agiwa sešwa gore o phatsime ka kgalalelo jaaka pele mo malatsing a bofelo. Modimo o ne wa ikaelela go busetsa Iseraele mo

mothalleng wa go ikanyega mo tsamaong ya bone gore ba o ikanye, ba o rate, ba o boife bogolo go dilo tsotlhe, gape ba tlhokomele ba ba tlhokang thuso ka botshelo jwa lorato, jaaka batlholagadi, dikhutsana, bahumanegi, le balwetsi. Mo ditirong tseo Jesu o itshwantshitse le kgogo e e phuthang dikgogwana tsa yona ka fa tlase ga diphuka. Gape o ne a tshwaya gore dikago tse dintšhwa tsa kwa Jerusalema ga a nke a di femela, fa ba sa tlabologe, le e seng go boela mo Modimong ka boikanyo jo bo tshelang jo bo ikanyegileng, a re: Le tsona di mo kotsing e kgolo ya go digwa, le go senngwa fela, fa ba sa tlogele ditsela tsa boleo, le botshelo jo bo maswe. Le tempele e ntšhwa e ne e fetotswe ke bone go nna logaga lwa dinokwane, e ne e sa tihole e dirisediwa maikaelelo a felo fa go ikanyegileng ga badiredi ba Modimo ka tirelo-Modimo e e itumedisitseng Modimo go nna ntlo ya thapelo, nyaya, ya dirisiwa go nna felo ga ditsietso, le dikgwebo tsa go ikhumisa. Jesu o ne a tlhagisa a re: Bosula jwa bone bo tla khutlisiwa morago ga sebakanyana a re: Modimo o tla tlhatlosa seatla sa ona go ba betsa mo go maswe, go ise go fela sebaka se selelele. A re: O tla fetsa ditsietso tsa bone, le ditirelo tsa bona tsa go direla medimako.

Dikgalemelo tseo tsa Morena wa botshelo Jesu Keresete di mmogo le taletso ya gagwe ya lorato lo logolo e e supang tsa bopelonomi jwa gagwe. O tshotse metsi a botshelo go timola lenyora, e seng go fetsa lenyora sebakanyana fela, mme o le tima ka bosakhuleng. O tshotse senkgwe sa go tima tlala yotlhe. O laletsa batho botlhe gore ba tle go ene go nwa metsi ao, le go ja senkgwe seo, ba sa duele sepe. O oketsa taletso ya gagwe ka "go otlololela batho ba ba sa utlweng, ba ba ganetsang, mabogo letsatsi lotlhe," Baroma 10:21. Mo bofelong a ineela go otlolola mabogo a gagwe mo sefapaanong ka go nna setlhabelo sa botlalo sa maleo a batho botlhe ba merafe yotlhe ba dipaka tsotlhe, gore e nne tefelo ya melato yotlhe gore re baakanyediwe pholoso ya botlalo. Re fodisitswe ka dintho tsa gagwe. Loso lwa gagwe ke motswedi wa botshelo jwa rona, le kgololo ya rona. Ka moo re abelwa boitshwarelo jwa dibe tsa rona, le pholoso le botshelo jo bo sa khutleng, re se nne le ditlhong go ya bosakhutleng ka ntlha ya gagwe, mme re mo ikanye mmogo le ditsholofetso tsa gagwe tse di itumedisang, le bopaki jotlhe jo bo mo supang ka mafoko a le mantsi. Ya re a sena go tsosiwa ka letsatsi la boraro e le Mofenyi yo mogolo mo phupung, e le moruaboswa wa dilo tsotlhe, e le marang a kgalaleo ya Modimo le setshwano sa bodimo jwa ona, e se yo o sa itsiweng fela, mme e le Morwa yo o rategang wa Modimo, le Moruaboswa jo bo tshhegofetseng wa legodimo, e le tempele e ntšhwa ya Modimo mo gare ga rona, e e

leng kereke ya gagwe, e e leng le mmele wa gagwe le gona, phuthago ya boitshepi. E ntse e le ene yo o re gogang ka taletso ya gagwe gore re nne ba ntlo ya gagwe e e tshelang, re nne ditokololo tsa mmele wa gagwe tse di tlhapisitsweng mo maleong a rona ka madi a gagwe. Ga go na sepe se se ka bong se na le thata ya go re phamola mo diatleng tsa ga Jesu Keresete yo o filweng thata yotlhe mo legodimong le mo lefatsheng, yo o busang a tshela, a ntse a re bolokile le pholoso ya rona sentle mo diatleng tsa gagwe. Ke gona re ntseng mo go ene, re itumelela kagiso e e sa khutleng, le thato e e re baakanyeditseng tsotlhe tse di molemo ka go re amogela mo kopanong ya gagwe ka kolobetso, re nne bana ba Modimo. Fela jalo go tla diragala mo bokhutlong, fa re bidiwa ke Morena gore re bone Jerusalema wa legodimong kwa Morena wa rona Jesu Keresete e leng lesedi teng, mmogo le Rraagwe le Mowa o o Boitshepo, Modimo o o osi, o e neng e le ona mo tshimologong, e ntse e le ona le jaanong, e tla nna e le ona go ya bosenangbokhutlo.

Modimo wa rona ke o o digang, yo e bileng e le o o agang. Ke Mmusi, Ramaanokago, Moagi, Modisa wa ntlo ya tempele e e boitshepo ya ona, e le lefatshe la ga Keresete, le lefatshe lotlhe. O re biditse gore re nne ditena tse di tshelang mo tempeleng ya gagwe, re ba losika lwa gagwe, re nne ba gagwe, re tshele ka fa tlase ga gagwe mo pusong ya gagwe, re mo direle ka tshiamo le ka boitsheko le ka boitumelo jo bo sa feleng. Go a diragala ka fa thatong ya gagwe ya go re rata jaanong le ka bosakhutleng. Amen.

9. Thapelo: Modimo Rara wa rona yo o mo legodimong, re go leboga ka ntlha ya lorato lo logolo lwa gago lo o busang phuthago ya gago ka lona, e bong morafe wa gago o o boitshepo. Re a kopa gore o re boloke mo tumelong ya nnete, o re tshegetse. O re rute gore re tshabele mo bopelotlhomoging jo bogolo jwa gago, re se latlhe boikanyo, le e seng tsholofelo, mme re tshele mo loratong lwa gago, re hutsafalele maleo a rona, re kope boitshwarelo ka metlha, re tsamaye mo tseleng ya gago e e yang mo legodimong mo pusong ya gago e e sa khutleng ka ntlha ya ga Jesu Keresete, Amen. Thapelo ya Morena: Rara wa rona yo o mo legodimong ...

10. Sefela sa 223 - 209/217

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. P. P. W. Weber ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.